

Silberschieber



Mir wenn au ebbis an d'Fasnacht bringe
Und eich vom Schiebe e Liedli singe
Schiebe hi, Schiebe här
Wenn nur der Krieg no wär.

Hitzetag isch e gar besi Sach
Jede Tag macht e Gschäftli Krach
Schiebe maint mänge, isch nit dumm
Aber am End gots halt doch krumm
Schiebe hi, Schiebe här
Wenn nur der Krieg no wär.

Der Kurs isch jetze gar wit unde
Drumm werde d'Lehrbuebe nommee gschunde
Uff der Agsle e schwers Seckli
Im Schiletäschli nur e Weggli
Schiebe hi, Schiebe här
Wenn nur der Krieg no wär.

Uff d'Banke mien si mit Rolle springe
Deheim tuet si der Schef asinge
Die Silberrolle sin gar schwär
Wenn nur die Schieberei nit wär
Schiebe hi, Schiebe här
Wenn nur der Krieg no wär.

Z'Basel am mim scheene Rhy
Nischte zich vil Schieber y
Der ganzi Tag wird gschobe
Vom Morge frie bis Zobe
Schiebe hi, Schiebe här
Wenn nur der Krieg no wär.

Scho in der Schuel dien Buebe blagiere
Was ihri Vätere alls vollfiere
Großartig wird uff der Stroß verzellt
My Alte het so und sovil Rolle bschtellt
Schiebe hi, Schiebe här
Wenn nur der Krieg no wär.

Jetzt aber wemmer selber schiebe
Sunsch kenntet ir ich in is verliebe
Und unseri Rolle b'halte do
Wo mir henn iber d'Grenze gno
Schiebe hi, Schiebe här
Lends sy, fir eich ischs zschwär.